

lis Gnovis

■ **BARBANE.** I munics a protestin pes scovacis dai pelegrins



Il Santuari che si cjate te isule di Barbane, custodît cumò dai fraris benedetins, al da acet, ogni an, a centenârs di fameis cun mularie al seguit, devots e curiôs che a fasin vive la isule, ma che in tancj, oltri la fede o la curiositât, si puartin daûr ancje la mangjative e lis bevandis. E chi al sta il probleme, parcè che in tancj di lôr si dismentein, magari cence fâlu di pueste, dai refudums, cussì che scartoçs, cjartis, bocons di mangjative e butiliis si spandin dapardut, e i puars fraris, cundut il jutori dai volontaris, no rivin plui a stâ daûr a racuei lis scovacis e a puartâlis cuntune barcje private, fin a Grau. Finide la pazienze di Jop, il Consei dai Afârs economics dal Santuari al à mandât fûr un avis, che tratantsi di fraris, al pâr scuasit une preiere, a chei che a vuelin visitâ Barbane: puartaitsi a cjase i vanzums!

■ **FRIÛL.** Aghis netis, ma i cartei...



Te nestre region il 100% dai puescj che a son stâts monitorâts dai esperts de “Goletta Verde” e di “Legambiente”, a son risultâts dentri dai limits stabilîts de leç. Il lavôr al à cjapât dentri in dut, dîs puescj: il 60% di mâr e il 40% di flum, tes “vecjis provinciis” di Udin e di Gurize, confermant i risultâts dal an passât. Uniche pecje, la mancjance di cartei cu la indicazion de cualitât des aghis, e dome un cartel che al proibive la balneazion. In dal rest, no coventin, se ni cuaiis, cjaçadôrs, bagnants si degnin di dâur un voli...

■ **SANT VÎT DAL TILIMENT.** Oco ai cartei!

Une cuaie maronite – cemût che a son dutis lis cuaiis – e becolave cun plasê suntun cjamp des bandis di Sant Vît, dulà che ancje i cjaçadôrs si inzegnavin a imparâ a sbarâ cu lis lôr sclopis di ordenance. Un cjaçadôr, olmade la cuaie, cjapade la smire, al sbare un colp di balins di cjace. Un “runner”, che miôr par furlan si disarès “coridôr”, al coreve dut sudât suntun troi che al cercenave il cjamp di adestrament dai cjaçadôrs, e ve che cualchi balin lu colpîs al braç e vicin dal voli di drete. Vie in ospedâl a medicâsi e po dal oculist par viodi dal voli. Il cjamp di adestrament al jere regolâr cun tant di cartei, la scope dal cjaçadôr ancje, si ben che la sô smire no si sa. Ni la cuaie ni il coridôr al risulthe che a vebin let i cartei...

Miercus 24	S. Zuan il Batist	Domenie 28 XIII Domenie vie pal an
Joibe 25	Madone di Monsante	Lunis 29 S.ts Pieri e Pauli
Vinars 26	S. Josemaria Escrivà	Martars 30 S.ts Prins martars
Sabide 27	S. Ciril	Il timp Zornadis cjaldis.



Il soreli
Ai 24 al jeve aes 5.16 e al va a mont aes 21.02.



La lune
Ai 30 Lune plene.

Il proverbî
Miôr un boccon di lum che lâ a durmî di scûr.
Lis voris dal mès
Tal ort in chest periodi o vês di ce tirâ jù e di ce cjapâ sù: cudumars, pomodoros, cesarons, cucins, cevolis, freulis.

Il gust dai Romans a Aquilee

Cui sa se al è propit vèr che i triumvîrs Manli Acidin, Gai Flamini e Publi Sipion Nasica, tal 181, a vebin fondade la colonie di Aquilee par mandâ indaûr chei osteâts dai Gjai, che a vevin invadude buine part dal Venit, cemût che al veve scrit Tît Livi o ben, cemût che al veve sostignût pre Bepo Marchet, i Gjai a vivevin di agnorums des nestris bandis, pa la cuâl, invezit, chê dai Romans e sarès stade la prime invasion dal nestri teritori. E duncje chê dai Romans e sarès stade une motivazion di comut par meti lis grîfis ancje culi. Une invasion in plene regule, chê romane, che si veve puartât indaûr, cui legionaris, ancje uns trê mil fameis che a vignivin dal Abruç e de Campanie, fameis che si messedarin avonde prest cu la int dal puest, ancje parcè che di chestis bandis si beveve avonde ben. Prin de rivade dai Romans, di fat, chenti di nô si produseve un vin “nigerrimus”, par dile in latinorum, un vin cetant neri, clamât “Pictano”, che a chel che si sa al plaseve no dome ai nostrans, ma ancje a chei che a stavin vicins. Secont il miedi Valerio Rossitti, apassionât cultôr di storie de mangjative romane e nostrane, al podeve jessi un antenât dal Refosc; dal sigûr, antenât dal Refosc al jere il “Pucinum”, che secont Plini il Vieli al nasseeve tal Golf dal Mâr Adriatic, su di un cuel plen di claps, dulà che l’aiarin dal mâr al fâs madurî pocjîs anfuris. Nol sarà stât mighe parcè che, par vie che a chest vin si conferivin proprietâts miracolosis, cun cheste scuse Livie, la seconde femine dal imperadôr August, a ’ndi veve bevude une grande cuantitât, cussì di rivâ in buine salût a une lungje vite? I Romans a traspuartavin il vin tes anfuris, ma i “barbars” Gjai in caratei e botis di len, che i conferivin un “bouquet” particolâr.



Stant a Polibi, za viers dal II secul, des nestris bandis e jere une fuarte produzion di purcits

Ancje in Friûl si produseve un persut di cuesse, clamât “perna”, ma ancje persuts di spale, luianiis, lis cetant riciercjadis mangiativis dai “rês”, il carrè (l’ombul) e i rognons.

E di chestis botis “barbaris”, vie par il teritori dai Gjai de Cjargne, a’ndi vevin di jessi in bondance, se il storic Erodian al conte che i soldâts dal imperadôr Massimin il Tracic, in marcje di svinçiment a Aquilee, a vevin costruît un puint di botis ae Mainize, sul Lusinç. La citât di Aquilee, a un ciert pont, e jere diventade crosere no dome di popui, di lenghis e di religjons diferentis, ma ancje di...cantinis, par vie di une vivarose ativitât comerciâl vinarie: no dome e traficave cun Rome e cul rest de Italie, ma ancje cui popui vicins, e parfin cu la Grece, a contâ lis tantis anfuris vinariis cjatadis a Aquilee. No dome si beveve vin – almancul chei che a podevin – ma ancje si cirive di crustulâ alc sot dai dincj, massime la cjar, che de agriculture, alore, si gjavave fûr pocut. In chei timps cussì lontans, e nas une tradizion che e vîf, par fortune, ancje vuê: chê dal

arlevament dal purcit che no si bute vie nuie. Stant a Polibi, za viers dal II secul, des nestris bandis e jere une fuarte produzion di purcits, arlevâts tai boscs di glants, che ur conferivin un savôr particolâr, e che lis lôr cjaris confezionadis a cjapavin la strade dai parons di Rome, lassant dome cualchi cicin ai locâi. Prin di dut ancje culi si produseve, graciis ae cjar di un purcit clamât “griot” (purcit che al sa di salvadi), un persut di cuesse, clamât “perna”, ma ancje persuts di spale, luianiis, lis cetant riciercjadis mangiativis dai “rês”, il carrè (l’ombul) e i rognons. Un altri arlevament al jere chel des ocjîs, che pai abenâts a vignivin ingrassadis cui fics par otignî il “foi gras”, clamât “jécur ficatum”. Bovins e cjavai si preferivin tignîju di cont pal lat e pal lavôr, e si gustavin ancje lis cjaris di piore o di cjavre, lassant ai mancûl fortunâts chês di monton.

Roberto Iacovissi

Peraulis in dismentie

par cure di Mario Martinis

> GUGJE

s.f. = lavoro a maglia (dal latino aculeatus ‘a punte’, da confrontare con il veneto gugià ‘bastone appuntito e munito all’estremità di un chiodo usato da bovaio per spronare i buoi’) Fâstu la gugje ancje usgnot? Lavori a maglia anche stasera?

> GURLI

s.m. = girella, banderuola; frottole (dal latino parlato currulus ‘carro’, diminutivo di currus ‘carro, cocchio’) Pai fruts o ai fat il gurli cun la cjarte veline colorade. Per i bambini ho fatto una girella con la carta velina colorata.

> GUSIELE

s.f. = ago (dal latino acucella ‘piccolo ago’, diminutivo di acus, è da confrontare con il veneto gusèla, guselín ‘ago’, con il quale condivide lo stesso etimo) Cjolimi la gusiele che ti ponti i cjalçuts. Prendimi l’ago così ti rammendo i calzini.

> GUSTÂ

v. = pranzare (voce dotta, dal latino gustare, verbo iterativo-intensivo di *gūno) Si guste sul sunâ misdi, a la vecje. Si pranza a mezzogiorno, alla vecchia maniera.

> GÛT

s.m. = gobione, gobio, ghiozzo, pesce d’acqua dolce (voce dotta da latino gūtus, guttus; è attestato nell’italiano del XVI secolo) Plen e passût come un gût. Sazio e pasciuto come un ghiozzo.

> GUTIGNÂ

v. = stillare, cadere goccia a goccia (dalla voce dotta latina gutta ‘goccia’, attestata nell’italiano antico del XIV secolo) De cane de fontane e gutigne aghe frescje. Dalla fontana cade goccia a goccia acqua fresca. “...E dai ramaz rusada ‘a gutignava” (Cadel 21)